

PURWAKANING ATUR

Om Swastyastu

Sangkaning paswecan Ida Sang Hyang Widhi Wasa,sang maraga Sangkan Paraning Dumadi,taler sangkaning paswecan Ida Betara-Betari sane sampun jenek santi malinggihring niskala,Desa Adat Keramas prasida muputangnyuratang Awig-awig sane patut anggen sepat siku-siku pameneh,anggen dasar mapikayun dsar mawecana tur dasar melaksana muatang kasukertan jagate.Awig-awig Desa Adat Keramas puniki tan tiyos pinaka sarana,pinaka wahana,taler pinaka kanti sang muatang pamatut,pinaka suluh sang kahanan timira,mogi-mogi sahanan Krama Desa Adat Keramas pinaka pawongannia,Desa Adat Keramas pinaka palemahannia,setata manggguhng kerta raharja,dirgha hayu dirgha yusa sangkaning paswecan Ida Sang Hyang Widhi Wasa.

Parama suksman tityang kahatur ring sang sampun ngawantu nyuratang Awig-awig puniki, minakadi :

1. Bapak Bupati Kepala Daerah Tingkat II Kabupaten Gianyar,sane tan maren setata mapaica pawarah-warrah,taler sampun ledang mapaica dana punia lamakane prasida Awig-awig puniki kasuratang mangkin.
2. Team Pembina Penyuratan Awig-awig Desa Adat Kabupaten Gianyar,sane sampun mapaica tuntunan,tan bina kadi mapaica sinar ring sang kapetengan,tan bina kadi mapaica toya ring sang sedeng kasatan makawinan paicannyane prasida muputang sasuratan Awig-awig puniki.
3. Krama Desa Adat Keramas minakadi Krama Banjar Biya,Krama Banjar Gelgel,Krama Banjar Palak,Krama Banjar Lodpeken,Krama Banjar Lebah,Krama Banjar Maspait,taler ring para Prajuritania.
4. Para Panglingsir,Para Pamuncuk tur Para Sujana sawidangan Desa Adat Keramas sane sampun mapaica sarining idep nirmala,nyarengin mapabigbagan,nyarengin mapaiguman nunggilang arsa miwah cita lamakane Awig-awig puniki prasida kasuratang.
5. Sang kacatri dados “Team Perumus”,sane mupulang,ngagilihin tur ngaruntunangbawos para Panglingsire,Pamucuke,Sang Sujana,Sang ngawewenang,matangnian sida kasurat dados Awig-awig puniki.
Sang Kacatri dados “ Team Perumus “ luwire :
 - a. I Gusti Putu Putra
 - b. Drs.I Gusti Agung Wiyat,BA
 - c. Drs.Ida Bagus Made Putra

- d. I Gusti Putu Mega
- e. I Wayan Arditha,SH
- f. Drs.I Wayan Kurma

Mogi Ida Sang Hyang Widhi Wasa, Ida Betara Betari malarapan Awig-awig Desa Adat Keramas puniki setata asung kerta wara lugraha, mapaica tuntunan, ngembang titi-panganan mangda kapanggih MOKHSARTAM JAGADITA YA CA ITTI DHARMA.
Om, shanti, shanti, shanti, Om.

Bendesa Desa Adat Keramas



I Gusti Putu Putra

PIDAGING
MAKA BANTANG AWIG-AWIG DESA ADAT KERAMAS

		Widang	
MOTTO			i
PURWAKANING ATUR			ii
PIDAGING			iv
MURDDHA – CITTA			1
SARGA	I	ARAN LAN WAWIDANGAN DESA	1
	II	PATITIS LAN PAMIKUKUH	2
	III	SUKERTA TATA PAKRAMAN	2
		Palet 1 Indik Krama	2
	Palet 2	Indik Prajuru	5
		Palet 3 Indik Paruman	8
		Palet 4 Indik Kulkul	9
		Palet 5 Indik Druwen Desa	10
		Palet 6 Sukerta Pamitegep	11
		Kaping 1 Karang, Tegal, Carik ...	11
		Kaping 2 Papayonan	12
		Kaping 3 Wawangunan	13
		Kaping 4 Wawalungan	13
		Kaping 5 Indik Bhaya	14
		Kaping 6 Panyanggran Banjar	15
SARGA	IV	SUKERTA TATA AGAMA ...	16
		Palet 1 Indik Dewa Yadnya	16
		Palet 2 Indik Rsi Yadnya	20
		Palet 3 Indik Pitra Yadnya	21
		Palet 4 Indik Manusa Yadnya	24
		Palet 5 Indik Butha Yadnya	25
SARGA	v	SUKERTA TATA PAWONGAN	27

		Palet 1 Indik Pawiwahan	27
		Palet 2 Indik Nyapian	28
		Palet 3 Indik Sentana	29
		Palet 4 Indik Warisan	31
SARGA	VI	WICARA LAN PAMIDANDA	34
		Palet 1 Indik Wicara	34
		Palet 2 Indik Pamidanda	34
SARGA	VII	NGUWAH-NGUWUHIN AWIG-AWIG	35
SARGA	VIII	PAMUPUT	36
		PAMAHBAH LAN PANUNTUN	36
		PARAREM-PARAREM	40
		PARAREM INDIK TAMIU	51
		PUTUSAN PESAMUAN PRAJURU PANGAREP SABHA DESA DESA ADAT KERAMAS,REDITE 28 FEBRUARI 1999	57

MURDDHA – CITTA

OM SWASTYASTU, OM AWIGHNAMASTU NAMA SIDHAM

Putusing pasaban Krama Krama Banjar BiyaDesa Pakraman Keramas, gumawe Awig-awig maka sepat siku-siku pameneh, wastu kasidan prayojanan mami kabeh prasama angidep muwah amagehaken kadi linging awig-awig iki.

SARGA I ARAN LAN WAWIDANGAN BANJAR Pawos 1

- (1) Banjar Adat puniki mawasta Banjar Biya
- (2) Jebar kakuwub wawidanganna mawates nyatur :
 - a. Sisi Kangin : Jalan Gaga
 - b. Sisi Kelod : Jalan Bengkudu
 - c. Sisi Kauh :Jalan Dayang
 - d. Sisi Kaja : Jalan Ulun Desa
- (3) Banjar BiyaDesaPakraman Keramas kawangun antuk Karang Desa, kapah dados nem (4) banjaSubak kadi ring sor
 - a. Subak Palak
 - b. Subak Biya;
 - c. Subak Bedanyah
 - d. Subak Palak Lagi
- (4) Manut Tri Lingganing Desa, kuwub wawidangan Desa kapah dados tiga :
 - a. Utama Mandala, pinaka tegak Khayangan Desa;
 - b. Madya Mandala, pinaka papupulan karang paumahan lan telajakan Desa;
 - c. Nista Mandala, pinaka setran Desa.
- (5) Indik palemahan Banjar:
 - a. Watesnyane kamanggehang antuk pararem Desa;
 - b. Kapah dados Subak-subak Banjar kadi sinurat ring ajeng.

Pawos 2

- (1) Banjare wenang ngardi pararem lan pasuara maka pamitegepnia
- (2) Pararem lan pasuara Banjar tan dados lempas saking Awig-awig Desa
- (3) Sahanan Subak Banjar tan wenang ngardi pararem, saantukan Subak Banjar punika maawak Banjar, yan pasuara wenang.

SARGA II
PATITIS LAN PAMIKUKUH
Pawos 3

Desa Adat Keramas ngamanggehang pamikukuh :

- a. Pancasila ;
- b. Undang-undang Dasar 1945 ;
- c. Perda Propinsi Tingkat I Bali No. 06 Tahun 1986 ;
- d. Tri Hita Karana manut sada cara Agama Hindu.

Pawos 4

Luwir patitis Desa Adat Keramas :

- a. Mikukuhin lan ngarajengan Sang Hyang Agama ;
- b. Nginggilang Tata Prawretin Agama ;
- c. Ngrajengan kasukertan Desa saha pawongannia sami sekala lawan niskala.

SARGA III
SUKERTA TATA PAKRAMAN
Palet 1
Indik Krama
Pawos 5

- (1) Krama Desa inggih punika kaluwarga sane maagama Hindu, ngamong karang Desa ; utawi kaluwarga sane maagama Hindu jumenek ngenahin karang gunakaya wiadin madunungan ring sajeroning palemahan Desa Adat Keramas
- (2) Sajaba punika sinanggeh tamu.

Pawos 6

Bacakan Krama Desa utawi Krama Banjar :

- a. Krama Pangarep inggih punika krama sane sampun mawiwaha tur sampun mawidhi-widana tur ngamong karang Desa utawi karang gunakaya ;
- b. Krama Padunungan inggih punika krama sane tan pakarang, jumenek ring Desa Adat Keramas ;
- c. Krama Balu inggih punika krama sane katinggalin lampus antuk sinalih tunggil lanang utawi istri;
- d. Krama Ubuh inggih punika krama sane katinggalin lampus antuk yayah renania ;
- e. Krama Daha Truna inggih punika krama sane mawiwit saking krama ubuh, sampun mayusa nembelas (16) warsa sane istri, siangolas (19) warsa sane lanang tur dereng maswami/marabi.

Pawos 7

Kawit dados Krama Desa utawi Krama Banjar :

- a. Mawiwit sangkaning jumenek ring karang Desa ;
- b. Malarapan antuk pawiwahan tur sampun mawidhi-widana manut dresta lan Agama ;
- c. Sangkaning sampun mayusa nembelas (16) warsa sane istri siangolas (19) warsa sane lanang tur dereng maswami/marabi ;
- d. Mawiwit saking jenek mapumahan wiadin ngarereh pangupajiwa sajeroning palemahan Desa Adat Keramas tur sampun ngalintangin pawanengan tigang (3) sasih, sajawaning sane ngamargiang pakaryan Pemerintah (Pegawai Negeri).

Pawos 8

Panemayan tedun dados Krama Desa/Krama Banjar :

- a. Nem (6) sasih sasampun upacara pawidhi-widananya, sakirang-sakirangnia Pabia Kalan, kadulurin antuk atag-atagan.
- b. Ageng-alit atag-ataganne manut pararem Desa.

Pawos 9

Tategenan Krama Desa utawi Krama Banjar luwire :

- a. Krama Pangarep keni ayahan muah papeson mungkul ;
- b. Krama Padunungan keni ayahan mungkul, tan kakenanin papeson ;
- c. Krama Balu Ngarep keni ayahan muah papeson manut pawongannia ;
- d. Krama Ubuh dereng munggah Daha/Truna tur tan madruwe pangundul utawi tan wenten ngerobang, luput ayah lan papeson ;
- e. Krama Ubuh sane sampun munggah Daha/Truna, tan keni ayahan nanging kakenanin papeson mungkul.

Pawos 10

(1) Swadharmaning Krama Desa utawi Krama Banjar :

- a. Drda-atuang ring Desa utawi Banjar ;
- b. Tinut satuut ring sadaging Awig-awig, pararem lan pasuara-pasuara Desa utawi Banjar ;
- c. Tan maren ngutsahayang mangda Desane sida nyujur kadi Patitis Desane.

(2) Swadharmaning Tamiu :

- a. Tinut ring tatiwak Desa Adat Keramas ngupadi sukertan sekala lan niskala ;
- b. Nenten tungkas ring kertin Desane utawi Banjare ;
- c. Sahanang tamiu mangda matur piuning ring Prajuru, salanturnia nyabran awuku mangda matur piuning malih ring Prajuru yening sang tamiu kantung ring wawidangan Desa Adat Keramas.

Pawos 11

(1) Sahanang Krama Desa utawi Krama Banjar polih pasayuban Prajuru tur kabawosin saha katiwakin pamatut asing wicaranya manut kadi Patitis Desane;

(2) Sahanan Krama Desa utawi Krama Banjar patut nyarengin paruman Desa utawi Banjar tur wenang sareng mastikayang pamutus

(3) Sahanan Krama Desa utawi krama Banjar kadadosang :

- a. Mapuankid : ngaluputin ayah-ayahan Desa utawi Banjar maduluran sasdok saantukan sungkan, mayadnya, matepetin miwah sane tiyosan manut pararem ;
- b. Nyada : ngamademang ayahan, saantukan sampun jada (lintang yusa), sungkan-sungkunan nanging papeson kakenanin sepatutnia manut pararem Desa ;
- c. Kasusukin : ayah-ayahane kagentosin antuk anak tiyos. Sane kadadosang nyusukin yening sang panyusuk sampun mayusa Daha/Truna utawi sampun maswami/marabi manut paetangan ;
- d. Mogpog: ngentosin ayah-ayahan utawi papeson antuk arta brana (jinah). Mungging agung-alitnia manut pararem ;
- e. Ngoot : ngentosin ayah-ayahan utawi papeson antuk arta brana yening magenah ring Dura Desa. Sajabaning punika tan kadadosang ngoot ;
- f. Luput. Sane kadadosang luput luwire : Prajuru Desa Adat manut awig tur Prajuru Desa manut kabuatang Pemerintah.

Pawos 12

Wusan dados Krama Desa lan pah-pahannia

- (1) Wusan dados Krama Desa utawi Banjar sangkaning :
 - a. Magingsir genah saking wawidangan Desa saha nunas ilikita lugraha saking Prajuru ;
 - b. Kanorayang antuk Banjar utawi Desa madasar antuk pararem Banjar/Desa;
 - c. Nilar Agama Hindu.
- (2) Sang wusan makrama Desa utawi Banjar tan polih pah-pahan sahananing druwen Desa utawi druwen Banjar, saha ngawaliang karang desa yening ngenahing karang Desa.
- (3) Yening mawali makrama Desa utawi makrama Banjar sangkaning katerima malarapan pararem Desa utawi Banjar, keni pamidanda manut pararem Desa utawi Banjar.

Palet 2 **Indik Prajuru**

Pawos 13

- (1) Desa Adat Keramas kaenterang antuk Bendesa
- (2) Banjar kaenterang antuk Kelihan Banjar
- (3) Subak Banjar kaenterang antuk Kelihan Subak Banjar
- (4) Bendesa, Kelihan Banjar, Kelihan Subak Banjar kamadegang sangkaning kagilih ring paruman suwang-suwang.
- (5) Sakancan Prajuru sinurat ring ajeng kamanggehang sajeroning limang (5) warsa tur dados kagilih malih.

Pawos 14

- (1) Bendesa kasangga antuk :
 - a. Patajuh utawi Pangliman pinaka wakilnia
 - b. Panyarikan pinaka juru surat
 - c. Patengen pinaka juru raksa druwen Desa
 - d. Kasinoman pinaka juru arah
 - e. Kelihan-kelihan Banjar
 - f. Para utusan Banjar pinaka Duta suwang-suwang banjar sane makatah nyabran seket (50) diri pawilangan krama, maduwe utusan sanunggal.
- (2) Sane dados kagilih kaangen Prajuru Desa utawi Prajuru Banjar tur panyanggia :
 - a. Mawiwit saking Krama Pangarep ;
 - b. Sampun mayusa selae (25) warsa ;
 - c. Uning nyurat tur ngawacen aksara latin lan/utawi aksara Bali ;
 - d. Sadu, mawibawa, maparisolah rahayu ;
 - e. Nenten naanin mapenjara ;
 - f. Yening Pegawai Negeri utawi ABRI mangda wenten ilikita lugraha saking sang ngawewenang ;
 - g. Sumanggup dados Prajuru tur susatya pacang ngalaksanayang swadharmaning Prajuru kadi sinurat ring Awig-awig puniki.
- (3) Para Prajuru sinurat ring ajeng kagilih ring Paruman Agung Desa,
- (4) Sajeroning ngenterang kasukertan Niskala, Prajuru misimggihang Pandita muwah Pemangku Kahyangan Desa.

Pawos 15

- (1) Swadharmaning Bendesa utawi kelihan Banjar :
 - a. Ngenterang paruman-paruman Desa utawi Banjar ;
 - b. Ngenterang sadaging Awig-awig, dresta, pamutus tur pararem-pararem Desa utawi Banjar ;
 - c. Ngenterang sahananing brana druwen Desa utawi Banjar manut Patitis Desa utawi Banjar ;
 - d. Nuntun tur ngenterang Krama Desa ngupadikasukertan sekala lan niskala ;
 - e. Nuntun tur ngenterang Krama Desa ngulati tatujon Dharma Agama, Dharma Negara, Dharma Kamanusan, kasucian pawongan lan tata cara ngangge setra ;
 - f. Mawosan tur niwakang pamatut ring sahanan wicara Krama Desane ;
 - g. Maka Duta Desa utawi Banjar matembung bawos ring sapa sira ugi ;
 - h. Miwah sane tiyosan manut dresta.
- (2) Tata cara ngalaksanayang swadharmane kadi sinurat ring ajeng, tan maren manut ring awig-awig, dresta miwah pararem-pararem wiadin pamutus-pamutus Desa utawi Banjar.
- (3) Bendesa utawi Kelihan Banjar natak pamutus paruman Desa utawi Banjar manut linggih lan swadharmania suwang-suwang.
- (4) Swadharman Prajuru tiyosan ring Bendesa utawi Kelihan Banjar, wantah nyangga-nyerayanin Bendesa utawi Kelihan Banjar manut dudonan.

Pawos 16

Patias (olih-olihan) Prajuru Desa utawi Prajuru Banjar :

- a. Bendesa molihang upon-upon bukti ;
- b. Prajuru luput pepeson rerampe ;
- c. Patias tiyosan manut pararem.

Pawos 17

- (1) Prajuru kagentosin yening :
 - a. Lampus ;
 - b. Sampun manut ring wates sengkernia ;

- c. Nunas mararian ;
 - d. Kanorayang antuk Krama Desane utawi Krama Banjare dwaning ngawetuang byota utawi malaksana tan manut kadi swadharmaning Prajuru ;
- (2) Ngentosin utawi nganorayang Prajuru mangda sajeroning Paruman Agung tur kasinanggeming antuk Krama Desane utawi Banjar
 - (3) Prajuru sane kanorayang tan kadadosang kawaliang malih dados Prajuru.

Palet 3
Indik Paruman
Pawos 18

- (1) Paruman-paruman ring Desa utawi Banjar luwire :
 - a. Paruman Desa : kawentenang paling kidik apisan awarsa ;
 - b. Paruman Banjar : kawentenang manut dresta utawi manut pararem ;
 - c. Paruman Prajuru : kawentenang manut dresta utawi manut pararem ;
 - d. Paruman Sekaa Truna Truni : kawentenang manut awig-awignia.
- (2) Sahanan paruman prasida kalaksanayang yening sang patut nyarengin kehnyane langkung ring aparo
- (3) Sahanan paruman tan maren karihinin antuk pangarcana ring Ida Bhagawan Penyarikan saha widhi-widdana antuk ngaturang cane sajangkepnia
- (4) Krama Desa utawi Krama Banjar sane nyarengin paruman mangda ngangge busana adat, sanistania makawaca, mawastra, makampung/masasentengan tur tan kalugra makta gagawan sakaluwire
- (5) Tan kalugra ngawetuang suara gora utawi byota. Yening wenten kadi punika kakenanin pamidanda bea pacamil sanistania mabanten prayascita. Agung alit banten prayascitane manut bawos sang Pandita
- (6) Pamutus babawosanne ring paruman mangda ngutamayang briyuk-sapanggul
- (7) Yening rikala paruman nenten wenten mrasidayang ngawetuang pamutus, Prajurune mangda ngawitin parumane ngantos ping tiga. Yening taler tan prasida ngawetuang pamutus, Prajurune wenang nunas bawos ring sang Ngawa Wenang.

Pawos 19

- (1) Sajaba kadi sinurat ring ajeng, paruman Desa utawi Banjar taler dados kawentenang yening kabuatang yening kabuatang antuk Krama Desane langkungan ring aparo kehnia
- (2) Sang muatang punika mangda mastikayang bantang bawose sane sandang kabawosang ring paruman inucap.

Palet 4

Indik Kukul

Pawos 20

- (1) Kukul sajebaging Desa Adat Keramas luwire:
 - a. Kukul Desa, magenah ring Pura Desa ;
 - b. Kukul Banjar, magenah ring suwang-suwang Bale Banjar ;
 - c. Kukul Sekaa Truna Truni, magenah ring suwang-suwang Bale Banjar ;
 - d. Kukul Sekaa tiyosan magenah ring Prajuritania suwang-suwang.
- (2) Kukul Desa, Banjar, Sekaa tan dados katepak yening tan sangkaning patuduh Prajuritania
- (3) Tabuh tatepakan Kukul pastika matiyosan manut tatujon luwire :
 - a. Kalih tuludan banban, tengeran tedun manut kadi arah-arahan sinoman ;
 - b. Atuludan bulus, maka tengeran jiwa-bhaya minakadi ngamuk tur sakaluwire ;
 - c. Kalih tuludan bulus, maka tengeran artha-bhaya minakadi kamalingan, baak tur sakaluwire ;
 - d. Tigang tuludan bulus, maka tengeran geni-bhaya minakadi umah puun tur sakaluwire ;
 - e. Tigang klentungan nyantel, maka tengeran urung tedun.

Pawos 21

- (1) Sang nepak kulkul tan sangkaning pituduh Prajuru, patut digelis atur supeksa ring Prajuru maka babuat nepake
- (2) Nepak kulkul mangda manut ring kawigunania
- (3) Yening tan manut kadi sinurat ring ajeng, sang kasisipang patut mrayascita kulkul punika tur kakenanin artha-danda manut pararem

Pawos 22

- (1) Tengeran panca-bhaya wenang katedunin antuk sahanan Krama Desa saha gagawan manut ring bhayane
- (2) Tengeran panca-bhaya patut kasawurin antuk kulkul tiyosan

Palet 5

Indik Druwen Desa

Pawos 23

Padruwen Desa Adat Keramas sekadi ring sor :

- a. Kahyangan Tiga utawi Kahyangan Desa jangkep rauh busanania miwah piranti tiyosan ;
- b. Tanah laba pura Kahyangan Tiga, tanah bukti Bendesa ;
- c. Setra ;
- d. Piranti-piranti Desa utawi Banjar luwire :
 - Wawangunan ring Kahyangan Tiga
 - Bale Banjar ring suwang-suwang Banjar saha pirantinia
 - Miwah sane tiyosan
- e. Pasar.

Pawos 24

- (1) Upon-upon tanah laba Pura Kahyangan Tiga punika kaanggen patias Pemangku Kahyangan Tiga, prabea mecikang wawangun ring pura Kahyangan Tiga, taler kaangen mabea ritatkala piodalan utawi rarahinan ring

Kahyangan Tiga. Kakirangan ipun kasanggra antuk Krama Desa utawi Krama Banjar

- (2) Druwen Desa utawi Druwen Banjar nenten dados kaadol, sajabaning sampun kasanggemin antuk Krama Banjar manut Patitis Desane
- (3) Bendesa patut ngawedarang indik padruwen/panelas prabeane ritatkala paruman Desa utawi Banjar antuk ilikita pastika.

Palet 6
Sukerta Pamitegep
Kaping 1
Karang, Tegal Lan Carik
Pawos 25

- (1) Karang Desa, Carik utawi tegalan patut kawatesin antuk tembok, pundenan utawi pal beton manut dudonan
- (2) Yening wenten karang kabebeng tanpa pamesu, mangda kautsahayang margi.
- (3) Yening wenten karang kabebeng toya, sang madruwa karang kabebeng toya punika ngutsahayang mangda toyane tan ngarusak pekarangan tiyosan

Pawos 26

- (1) Karang Desa miwah teba, watese magaleng kaluan, minakadi wates sisi kaler lan sisi kangin kakaryanin antuk sang madruwe karang
- (2) Mangda kanten asri, wates sane marep kamargi katandurin bunga-bunga utawi karang sari

Pawos 27

- (1) Wates tegal utawi carik, magaleng kateben, minakadi sisi teben utawi sisi kelod lan sisi kauh patut kakaryanin antuk sang madruwe tegal utawi carike
- (2) Watese kadi sinurat ring ajeng, kadadosang marupa pagahan, pudukane wiadin prachina tiyosan minakadi pal beton, lsp.

Pawos 28

- (1) Suwang-suwang Krama Desa utawi Krama Banjar tan kadadosang :
- a. Ngalalah tanah karang, palaba Pura, margi, tegal miwaah carik druwen krama tiyosan utawi druwen Desa;
 - b. Ngalalah tegak tanah Kahyangan, setra miwah sane tiyosan;
 - c. Ngembahang toya sane mawit saking kandang wawalungan, kakus, pasirama, pawaregan ka paumahan krama tiyosan wiadin

ka margine, ka kahyangan, lan kagenae tiyosan mapuara wawidanganekaon;

- d. Ngentungan wangken miwah bacin wawalungan, luhu tur sakaluwire ka pekarangan krama tiyosan, ka tukade, ka margine, napi malih ka genahe sane kasuciang lan ka genahe tiyosan mapuara wawidanganekaon.
- (2) Sang nungkas warane (larangane) kadi sinurat ring ajeng kakenanin pamidanda prayascita tur pamidanda artha manut pararem

Kaping 2

P e p a y o n a n

Pawos 29

- (1) Ngawit nandur papayonan tanem tuwuh patut ameter tengah (150 cm) ngatengahang sakeng wates. Yening tanem tuwuh punika ngaliwat wates, wenang kasepat gantungin
- (2) Papayonan tanem tuwuh sane mategeh langkung ring sia (9) meter napimalih sane janten mayangin mangda digelis kabrasta
- (3) Yening wententatnduran ngungkulin tur mayanin kapisaga, sasampune kawara tur kasadokang ping tiga, nanging tatandurane nenten taler karebah, sang katetehan kajerihan wenang masadok ring Prajuru tur risampun kaparitasang, kalugra ngicalang tatanduran punika, sakewanten patin tatanduranne kadruweyang antuk sang nandur.
- (4) Sang kenit pamidanda yening wenten papayonan rubuh inggih punika :
 - a. Sang madruwe papayonan punika, yening papayonanne pungkut ngarubuhin padruwen krama tiyosan;

- b. Sang munggul papayonan punika yening ngarubuhin padruwen krama tiyosan;
- (5) Yening wenten papayonan mentik ring wates, kadruweang antuk sang madruwe watese
- (6) Krama Desa patut ngamanggehang kelestarian papayonan sane ngranayang Desane kanten asri (ngalestariang lingkungan)

Kaping 3
W a w a n g u n a n
Pawos 30

- (1) Wawangunane patut :
 - a. Ngangge Asta bhumi miwah gagulak Asta Kosala Kosali, sanistania manut ring Patitis Niskala
 - b. Tan dados nyayubin ka pisaga.
- (2) Yening wenten wawangunan nyayubin ka pisaga, Prajurune, risampune polih pasadok sakeng sang kasayubin, patut netesang tur salanturnia patut muputang wicarane manut pararem Desa utawi Banjar.

Kaping 4
W a w a l u n g a n
Pawos 31

- (1) Krama Desa utawi Krama Banjar sane miara wawalungan luwire banteng, bawi, kambing miwah wawalungan masuku pat sane tiyosan patut mlengbengin (kakandangin) wawalungannia mangda nenten ngarusak ka pisaga utawi ka margine, napi malih ngantosan ngaranjing ka genahe sane kasuciang
- (2) Sang tan nganutin kadi sinurat ring ajeng, katiwakin pamidanda mrayascita genahe sane kasuciang tur danda arta manut pararem

- (3) Krama Desa utawi Krama Banjar patut nyangga wawalungan miwah sarwa prani tiyosan, tan kapatutang ngamademang paksi miwah mina tur sakaluire sane mapuara wawidanganne kaon.

Pawos 32

- (1) Tan kadadosang ngangonang wawalungan ring :
- Palemahan sane kasuciang ;
 - Margi, palemahan Desa utawi palemahan Banjar ;
 - Carik miwah tegal sane madaging tatnduran ;
 - Pakarangan krama tiyosan saderenge kalugra antuk sang madruwe karang;
 - Setra
- (2) Sang tan nganutin kadi sinurat ring ajeng, katiwakin pamidanda mrayascita genahe sane kasuciang tur danda arta manut pararem

Pawos 33

Tata Cara Naban Wawalungan

- (1) Yening wenten wawalungan ngarajing kagenae sane kasuciang, pakarangan, tegal miwah carik druwen krama tiyosan, ngarusak tetanduran, wawalungan punika wenang kataban antuk sang katiben utawi antuk sang ngamanggihin
- (2) Sang polih naban wawalungan patut masadok ring prajuru tur prajurune patut maritetes kasujatiannia
- (3) Sang naban patut miara wawalungan punika sadereng wenten sane ngangkenin
- (4) Yening sang madruwe wawalungan punika saha bukti rauh ngangkenin, sang madruwe wawalungane punika kakenanin pamidanda manut pararem
- (5) Yening langkungan ring asasih ngawit wawalungane punika kataban nenten taler wenten ngangkenin, wewalungane punika jagi kalelang. Sang naban polih pangentos prabea pah pat ($\frac{1}{4}$),sisanne dados padruwean Desa/Banjar
- (6) Yening sampun tigang rahina, wawalungane sane kataban punika dereng wenten ngangkenin, sang naban patut nyadokang ring prajuru

- (7) Yening sang naban malaksana lempas ring Awig-awig puniki, sang naban punika kakenanin pamidanda manut pararem

Kaping 5
Indik Bhaya
Pawos 34

- (1) Bacakan sane kabawos dusta utawi bhaya luwire :
- a. Jiwa Bhaya ;
 - b. Arta Bhaya ;
 - c. Geni Bhaya ;
 - d. Paplengandangan ;
 - e. Duracara ring Agama.
- (2) Krama sane uning ring kawentenan panangkan bhaya, uning ring sang jagi/sedeng lumaksana dusta utawi bhaya, patut digelis matur uning ring Prajuru
- (3) Yening lintang bobot kahanan dusta utawi bhayane, sang uning patut digelis nyuarayang kulkul manut kawentenan dusta utawi bhayane, selanturnia digelis nguningang ring Prajuru
- (4) Kramane patutmedal mapitulung sahagagawan manut bhayane
- (5) Yening ring Desa kahanan jiwa bhaya, Desane patut ngaturang Bhuta Yadnya tur sang mayanin katur ring sang ngawewenang
- (6) Yening wenten jadmamamisuh utawi nguman-uman jadmamamisyos, kakenanin pamidanda pacamil tebasan prayascita lan danda arta manur pararem

Pawos 35

- (1) Pratingkahe mapailon ring dusta mawasta saruron.
Yening wenten jadmamanggihin maling, tan nyadokang ring Prajuru kantos jadmamamisyos nyaduang, isaruron kadanda kadi dandangin maling
- (2) Yening wenten jadmamngeranjinin pakubon wiadin pakarangan rikala suwung mawastu sang madruwe pakubon utawi pakarangan kaicalan, wenang sang ngaranjing punika katuwekang saka madewa saksi ring Pura Desa

- (3) Mangda tan katuwekang kadi ring ajeng, sane ngaranjingin pakubon utawi pakarangan jadma tiyos patut :
- a. Matengeran suara (makaukan) ;
 - b. Ngantosang sang madruwe pakubon utawi pakarangan, utawi masadok ring pangapit pinih tampek maka babuat pangranjinge ;
 - c. Pamedal pakubonne utawi karange kadagingin sawen, makacihna mapangarah rikala suwung.

Kaping 6
Panyanggran Banjar
Pawos 36

- (1) Yening wenten krama Desa jagi ngalaksanayang yadnya suka utawi duka, tur jagi unas panyanggran Banjar, mangda atur supeksa ring Prajuru Banjar manut agrng-alit yadnyane
- (2) Panyanggran Banjare wantah manut kadi dresta, pararem utawi pasuara Banjar suwang-suwang

Sarga IV
SUKERTA TATA AGAMA
Palet 1
Indik Dewa Yadnya
Pawos 37

- (1) Palinggih panyiwian sane wenten ring wawidangan Desa Adat Keramas luire :
- a. Pura Desa/Bale Agung;
 - b. Pura Puseh;
 - c. Pura Dalem;
 - d. Pura Melanting.
- (2) Rahina Piodalannia :
- | | |
|-------------------------|--------------------------|
| a. Pura Desa/Bale Agung | : Anggarkasih Medangsia; |
| b. Pura Puseh | : Anggarkasih Medangsia; |
| c. Pura Dalem Agung | : Anggarkasih Dukat; |
| Pura Dalem Sakti | : Buda Kliwon Dungulan; |

- Pura Dalem Koripan : Wraspati Umanis Dungulan;
Pura Dalem Bia : Wraspati Umanis Dungulan;
d. Pura Melanting : Buda Cemeng Klawu.
- (3) Piodalan ring Kahyangan Tiga ngenem (6) sasih apisan, alit apisan, ageng apisan. Rikala odalan, Ida Bhatara nyejer tigang rahina
- (4) Indik pangaci ring Kahyangan Tiga utawi Kahyangan tiyosan manut nista, madya, utama nganutin Sastra Agama lan dresta
- (5) Indik prabea :
- a. Kahyangan Tiga kasanggra antuk Krama Desa Adat Keramas manut dresta;
 - b. Melanting kasanggra antuk Krama Desa Adat Keramas;
 - c. Tawur Kasanga kasanggra antuk Krama Desa Adat Keramas;
 - d. Melasti rikala sasih Kasanga/Nyepi kasanggra antuk Krama Desa Adat Keramas.
- (6) Ngusabha Desa, Ngusabha Nini kawentenang majalaran antuk nunasang ring Sang Sulinggih miwah ring Prasadha Hindu Dharma Indonesia tur prabeannia kasanggra antuk Krama Desa Adat Keramas

Pawos 38

- (1) Ring Pua Desa/Bale Agung matunggilan sareng Pura Puseh, kaadegang Pemangku lanang-istri, sapunika taler ring Pura Dalem
- (2) Ngadegang Pemangku ring Kahyangan Tiga manut sinalih tunggil dudonan :
- a. Katurunan Pemangku sane let ;
 - b. Kagilih antuk Krama ring paruman Desa ;
 - c. Nyanjan utawi nunas pamuwus ring Ida Batara sane malinggih ring Pura inucap.
- (3) Sane nenten dados kaadengan Pemangku luwire :
- a. Cedangga luwire peceng, perot, tukung, cungik, tur sakaluire;
 - b. Kageringan luwire sakit ila, sakit-sakitan, buduh;
 - c. Sang sane nenten kasanggemin antuk pararem Desa.

Pawos 39

- (1) Sahanan Prabea yening ngadegang Pemangku Kahyangan Tiga Kasanggra antuk Krama Desa Adat Keramas

- (2) Prabea yening ngadegang Pemangku tiyosan ring Kahyangan Tiga minakadi Panti, Dadia,Pura Subak lsp, kasanggra antuk panyiwinia suwang-suwang

Pawos 40

- (1) Krama Desane mangda malebonang Pemangku Kahyangan Tiga sane seda
(2) Agung-alit upacara/upakarane manut pararem

Pawos 41

Swadharman Pemangku kadi ring sor :

- a. Ngaturang upacara piodalan rikala patirtan Ida Batara;
- b. Nyarengin utawi ngarombo Pemangku ring Kahyangan tiyosan rikala piodalan;
- c. Ngantebang aturang krama rikala Puja Wali, taler rikala Kramane ngaturang yadnya tiyosan;
- d. Mareresik ring Pura kasarengin antuk Juru Sapuh utawi Prajuru tiyosan sane sampun kepencial antuk Desa;
- e. Yening Pemangkune sampun ngayah ring Pura raris wenten pakulawargan Pemangku mucap lampus, Pemangku punika tan kacuntakan, sakewanten Pemangku inucap tan budal salami Piodalan.

Pawos 42

Patias utawi olih-olihan Pemangku Kahyangan Tiga :

- a. Sarin canang;
- b. Luput papeson;
- c. Luput ayah-ayahan sane nenten manut ring swadharman kapemangkuan;
- d. Saparo upon palaba Pura manut pararem;
- e. Luput tiyosan manut pararem Desa;
- f. Sabilang awarsa polih busana arangsukan;
- g. Yening Pamangku opname ring Rumah Sakit,Krama Desa Adate patut ngaturang dana punia sakasidan

Pawos 43

- (1) Yening wenten Pemangku Kahyangan Tiga sane ngarepin piodalan sungkan mapuara nenten nyidayang ngamargiang upacara, Pemangku Kahyangan Tiga sane tiyosan patut ngamargiang upacrane.
- (2) Yening wenten Pemangku Balu marabian malih, patut kagenahang kapamangkuannia; sajeroning asasih pitung dina sasampun karya pawiwahannia, makakalih patut kawintenin, kaprabeanin antuk Krama sane ngadegang.
- (3) Yening Pemangku Kahyangan Tiga keni ujar ala, ulah ala, Pemangku punika patut kaprayascita, kaprabeanin antuk Krama Desa. Sang maweh ujar ala kakenanin pamidanda manut pararem
- (4) Yening Pamangku Kahyangan Tiga kabuktiang animpal laku nyasar utawi palaksanane nenten manut ring sasanan kapamangkuan, melarapan paruman Desa, nenten kamanggehang malih dados Pemangku. Pemangku tiyosan ring Pemangku Kahyangan Tiga, yening melaksana kadi sinurat ring ajeng, pamutusnyane manut pararem sang ngamadegang Pemangku punika

Pawos 44

Krama sane jagi pendek tangkil ka Pura patut mabusana adat jangkep luire :

- a. Sane lanang mangda ngangge wastra malelanengan, makampuh, maumpal, makawaca, madestar manut susila Agama;
- b. Sane istri mangda mawastra, masenteng, makuaca manut susila Agama;
- c. Kapatutang tan makawaca yening mapayag agung;
- d. Busana adat kadi suwang-suwang adatnia yening sang pedek punika wong maagama Hindhu sakeng dura jagat Bali.

Pawos 45

- (1) Tan kalugra ngaranjing ka Pura :
 - a. Sang kacuntakan;
 - b. Sang makta sahanan barang sane sinanggeh ngaletihin manut dresta;
 - c. Wawalungan sane tan patut manut tata susila, sane nenten kaanggan upakara.

- (2) Ring sajeroning Pura miwah palemahannia tan dados :
- a. Masumpah utawi anayub cor sajawaning pituduh Prajuru;
 - b. Masanggama;
 - c. Munggah-tedun palinggih yan tan sangkaning pituduh Pemangku utawi Prajuru;
 - d. Ngamargiang titra lan upacara sajawaning Pemangku pengamong tur Pamangku sane ngarombo;
 - e. Mojar ala, ulah ala mamisuh, majajal, mayuda napi malih mapuara ngawetuang rah utawi padem;
 - f. Menehin busana, papusungan lsp;
 - g. Macecepin;
 - h. Tur sanetiyosan manut dresta

(3)Sang mamurug kadi kacape ring ajeng, kakenanin pamidanda pamerayascita sapatutnia

(4) Yening Kahyangane kahanan durmanggala minakadi kapancabhaya, sang nguningin kahanan durmanggalane, patut digelis nyadokang ring Prajuru tur digelis ngawentenang pamarayascita sapatutnia

Palet 2

Indik Resi Yadnya

Pawos 46

- (1) Krama Desa Adat Keramas patut ngadegang Pandita mawit sakeng Brahmana Wangsa manut dresta
- (2) Prajurune patut sareng nureksain, nyadokang ring sang rumawos minakadi Parisadha Hindu Dharma Indonesia tur sakaluire, mangda sulur lan pamargine yukti manut kadi linging Sastra Agama lan dresta
- (3) Sahanan sulur upacara ngadegang Pandita, kasanggra antuk Krama Desa Adat Keramas

Pawos 47

Swadarma Sang Pandita

- (1) Sang Pandita sarahina nguncarang weda (byuria-sewana) angulati sutreptin ikang rat manut linging Sastra Agama
- (2) Sang Pandita patut muputan yadnya Kramane manur dresta tur manut linging Sastra Agama yening Kramane mapinunas ring Ida
- (3) Sang Pandita patut ngariyining ngahayunin ring wawidangan Desa Adat Keramas, sesampunane muputang yadnya wawu ka Dura Desa

Pawos 48

- (1) Krama Desa Adat Keramas patut ngaturang punia bakti, sane ageng-alitnia manut pararem sane jagi kahatur ring Sang Pandita
- (2) Yening Sang Pandita lina, layonne kageseng manut dresta tur prabeane kasanggra antuk Krama Desa Adat Keramas

Pawos 49

- (1) Sang pacang mawinten minakadi dalang, sonteng tur sane tiyosan sane jagi ngenterang yadnya, patut masadok ring Prajuru
- (2) Prajurune wenang ngurungang yening macihna nyasar saking kecapin Sastra Agama wiadin dresta
- (3) Prajuru mangda gelis nyiarang indik kawentenan sang mawinten tur nyiarang pungkusannia rauhing kawenangannia muput yadnya

Pawos 50

- (1) Krama Desa utawi Krama Banjar, sajeroning ngamargiang upacara piodalan ring Kahyangan, kaenterang antuk Prajuru, katuntun antuk sulinggih
- (2) Prajuru Desa utawi Prajuru Banjar patut mikukuhin kasucian Sulinggih/Pemangku
- (3) sang nuur Sulinggih / Pemangku patut ngaturang punia manut ring agung-alit upacarane

Palet 3

Indik Pitra Yadnya

Pawos 51

Ngupakara sang lampus wantah kadi ring sor :

- a. Mendem ring setra maka chin, makingsan ring Ibu Pertiwi;
- b. Makingsan ring geni makachina makingsan ring Ida Batara Brahma, sakewanten abunne kapendem ring setra;
- c. Ngaben / Palebon
Ngaben / Palebon wenten kalih soroh :
 1. Manut dresta yening sang kaaben sampun maketus
 2. Ngalungah yening sang lampus mayusa tigang sasih ngantos durung maketus
- d. Tan kaabenang yening sang lampus wawu medal ngantos matuuh tigang sasih;
- e. Mendem pramangkin lan tan nyuarayang kul-kul yening sang lampus wawu medal ngantos durung maketus
- f. Upacara Pitra Yadnya risampune kaabenang, munggah daun bingin (ngeroras)

Pawos 52

Swadharman lan tatengenan yening wenten krama kalayu sekaran

(1) Sang kaduhkitan :

- a. Patut nyadokang ring Prajuru tur nunas tatimbang indik pamargi salanturnia
- b. Mastikayang ring Prajuru napike jagi kapendem utawikaaben

(2) Krama Banjar

- a. Suwang-suwang krama patut mapitulung ring sang kaduhkitan;
- b. Yening ngaben masa, suwang-suwang krama patut mapica patus ring sang mayadnya manut pararem;
- c. Yening ngaben dadakan, kramane nenten keni patus sakewanten patut mapitulung tur madanapunia ring sang mayadnya manut pararem
- d. Ritatkala nyandang sawa miwah saraniania mangda banban tur trepti kadulurin gagitan;
- e. Suwang-suwang krama mangda ngangge busana adat

Pawos 53

- (1) Pamendeman patut nginutin dewasa sane katiwakang antuk Bendesa utawi sulinggih
- (2) Yening durung wenten dewasa mendem, kadadosang makingsan ngantos rauh padewasania
- (3) Yening wenten wong tan Krama Desa Adat Keramas sakewanten maagama Hindu, jagi mendem utawi ngaben ring Desa Adat Keramas, patut ngaturang pananjung batu manut pararem, tur genahe mendem utawi ngabenang ring setra Pangalune

Pawos 54

- (1) Yening wenten wong lampus salah pati, angulah pati lan sakancanipun, dados kaprateka sapatutnia, maduluran banten panebusan lan ngulapin
- (2) Yening wenten wong lampus sangkaning sakit ila, gering agung, risampun kaupacarain sapatutnia, patut digelis kageseng (kakingsanang ring geni) raris abune kapendem ring setra nyantos wenten padewasan ngaben Desa
- (3) Yening wenten wong istri ngadut manik lampus, tan kadadosang kapendem utawi kageseng sadurung maniknia kamedalang sakeng bobotannia
- (4) Yening wenten wong lampus ring pekarangan, tegalan, carik utawi ring genahe tiyosan sane kasinanggeh suci, sang madruwe sawa utawi sang ngawenang cuntaka patut mrayascita genah inucap sadurung abulan pitung dina

Pawos 55

- (1) Kacuntakan utawi sebel sangkaning kalayu sekaran :
 - a. Sand madruwe sawa kacuntakan roras (12) rahina;
 - b. Sakeng pakilitan pakulawargan, tunggla dadya utawi pamerajan kacuntakan pitung (7) rahina;
 - c. Sebel Banjar tigang (3) rahina manut dresta;
 - d. Yening sang lampus punika anak alitb durung maketus, Krama Banjare nenten kacuntakan;
 - e. Sang ngalaksanayang pangabenan, kacuntakan ngawit sakeng ngawangun ngantos macaru.
- (2) Kacuntakan sangkaning ngaraja swala, salami ngaraja swala
- (3) Kacuntakan sangkaning ngamedalang oka, abulan pitung dina utawi ngantos upacara tutug kambuhan

- (4) Kacuntakan sangkaning karuron, abulan pitung dina ngawit karuron
- (5) Kacuntakan sangkaning pawiwahan, cuntakania ngantos sasampunematirta pabiukaonan
- (6) Kacuntakan sangkaning gamia gamana, cuntakania ngantos sasampune kapalasang/masapihan tur sampun kawentenang pamarayascita raga lan pamarayascita Desa
- (7) Kacuntakan sangkaning salah timpal, manut pararem lan pasuara
- (8) Kacuntakan sangkaning mobot tan sinangaskara, mamitra ngalang, cuntakania ngantos kawentenang upacara pabiukaonan
- (9) Kacuntakan sangkaning mamitra ngalang, salami durung ngamargiang upacara pabiukaonan
- (10) Kacuntakan sangkaning ngamedalang oka tan paupacara sanistania pabiukaonan, salami sang oka nenten wenten mameras manut dresta miwah manut linging Agama Hindu
- (11) Cuntaka Sad Tatayi, cuntakania ngantos sampun marayascita raga tur nenten pisan kadadosang ngamunggan upacara padwijatian Bacakan Sad Tatayi punika :
 - a. Atharwa : ngamargiang pangliakan
 - b. Dratikrama : mamarikosa
 - c. Sastragna : ngamuk
 - d. Rajapisuna : mapisuna
 - e. Agnida : ngenjutinsane ngawetuang bhaya
 - f. Wisada : nyetik, ngaracun
- (12) Yening wenten krama lampus ritatkala piodalan ring Kahyangan Tiga tur sampun ngambil kakaryan nyuci, pamendemannia tan kadulurin Nyuarayang kulkul, sawane kasulubang utawi kasirepang manut dresta ngantos Ida Betara kasineb
- (13) Sang luputin cuntaka :
 - a. Sang Sulinggih sane sampun madwijati;
 - b. Pinandita utawi Pemangku Kahyangan Tiga tur Pemangku tiyosan manut pawos 41 aksara e, tur manut dresta

Pawos 56

- (1) Atiwa-tiwa ngalaksanayang kadi sor
 - a. Sawa wadana : ngawaliang Stula Sarira ka Panca Maha Bhuta
Sawa wadana wenten kalih soroh :

1. Nyawa Rsi : atiwa-tiwa sane kalaksanayang duaning tan ngagah
utawi sawane tan kakeniang
 2. Sawa Prateka : mreteka sawa wawu bah
 - b. Atma wadana : mrateka sang Hyang Atma mangda acintya ring Ida Sang
Hyang Widhi
- (2) Tan dados mendem/ngeseng sawa miwah awak-awakannia ring karang
paumahan, tegalan, carik, sane nenten kasinanggeh setra
- (3) Sang Sulinggih (Sang sane ngamargiang Dwi Jati) patut kageseng ring
palemahan Desa Adat minakadi tegalan, carik, nanging sasampune uwusan
upacara pangesengan, genah inucap patut kaupacararin

Palet 4

Indik Manusa Yadnya

Pawos 57

- (1) Manusa Yadnya inggih punika upacara-upacara dharmaning manusa, ngawit
sakeng patemoning kama bang lawan kama petak sajeroning garba ngantos
kalayu sekar riwekas
- (2) Upacara kadi ring ajeng madudonan kadi ring sor :
- a. Magedong-gedongan duk pangerempinian sang ibu utawi bobotanne
sampun mayusa tiga ngantos petang (3-4) sasih;
 - b. Sang rare medal;
 - c. Kepus pungsed;
 - d. Rare matuuh roras (12) rahina;
 - e. Tutug kambuhan utawi rare matuuh abulan pitung rahina;
 - f. Sambutan rikala rarane matuuh tigang sasih;
 - g. Otonan rikala rarene matuuh nem sasih;
 - h. Rare matuuh tigang oton;
 - i. Mapetik rambut;
 - j. Tutug duur, ngaraja swala sang wadon, ngembakin sang lanang;
 - k. Mapandes utawi masangih;
 - l. Mawiwaha.
- (3) Mungging Agung-alit upacarane, nganutin nista-madya-utama, sakesidan
sang madruwe karya

Palet 5

Indik Bhuta Yadnya

Pawos 58

- (1) Bhuta Yadnya inggih punika upacara-upacara majeng ring sarwa Bhuta :
- a. Mabanten saiban (ngejot) sawusan maratengan;
 - b. Caru siap brumbun utawi eka sata;
 - c. Caru ngangge siap limang soroh utawi panca sata;
 - d. Caru siap lima, bebek belang kalung, asu bang bungkem utawi caru panca kelud;
 - e. Caru sasih kalima;
 - f. Resi gana;
 - g. Tawur kasanga;
 - h. Pamalik sumpah;
 - i. Tawur agung.
- (2) Segehan Kajeng Kliwon :
- a. Ring natar sanggah/pamerajan katur ring sang Kalan Bucari;
 - b. Ring natar paumahan katur ring sang Bhuta Bucai;
 - c. Ring natar lebu katur ring sang Durga Bucari.

Pawos 59

Sadurung rahina Panyepian, patut ngamargiang pamelastian ka segara. Ida Betara sarauhe sakeng sagara, nyejer ring Bale Agung ngantos uwusan ngamargiang upacara Tawur Kasanga.

Sawusan ngamargiang upacara Tawur Kasanga raris ngamargiang Pangrupukan

Pawos 60

- (1) Catur Brata Panyepian patut kalaksanayang rikala rahina Nyepi.

Catur Brata Panyepian luwire :

- a. Amati Geni : tan dados maapi-api sajabaning :
 1. Ring genah sang madruwe rare durung tigung sasih

2. Ring genah sang sungkan
3. Ring genah layon
4. Ring genahe wenten upacara wali,
sakewanten sinaran genine/suare tan
ngalingkub doh

- b. Amati Karya : tan dados nyambut pakaryan
- c. Amati Lelungan : tan dados malelungan, medal sakeng jero
- d. Amati Lelungan : tan dados ngewentenang sakancan sane
ngeranayang gaduh napi

malih sane janten ngawetuang langu.

- (2) Mangda Catur Brata Panyepiane mamargi trepti, Prajuru wenang
nureksanin, kawantu antuk Pacalang sane kaadegang antuk Krama Desa Adat
- (3) Sang tan nginutin Catur Brata panyepian kadi sinurat ring ajeng, kakenanin
pamidanda manut pararem.

Pawos 61

Rikala Ngenbak Geni, arahina sasampun Nyepi, patut ngalebar Brata Panyepian,
kadulurin masima krama utawi dharma santi ring para krama, semeton tur sane
tiyosan.

SARGA V SUKERTA TATA PAWONGAN

Palet 1

Indik Pawiwahan

Pawos 62

- (1) Pawiwahan inggih punika patemoning purusa kalawan pradana malarapan panunggalan idep suka cita kadulurin antuk upasakasi sekala lan niskala utawi tri upasaksi inggih punika saksi Dewa,saksi bhuta lan saksi Manusa.
- (2) Wenten tigang (3) soroh bacakan pemargin pawiwahan :
 - a. Mamasik;
 - b. Ngarorod;
 - c. Nyentana utawi nyeburin.
- (3) Sang mawiwaha patut :
 - a. Sampun mayusa Daha/Taruna (mangda nganutin undang-undang panegarane)
 - b. Madasar kayun pada arsa suka cita,tan kapaksa
 - c. Nganutin kecaping agama
 - d.

Pawos 63

Pawiwahan kadi sinurat ring ajeng mangda anut taler ring undang-undang panegarane.

Pawos 64

Yening wenten pasadok sane madasar antuk saksi lan bukti wenten wong salah krama : gamia gamana,dreti krama (mamitra,mamarikosa),patut kasisipang lan tan katutugang tur katiwakin pamidanda manut pararem,saha mrayascita Desa Agung-alit prayascitane manut dudonan sisipe

Pawos 65

- (1) Pawiwahan sane mawit saking sinalih tunggil bina Agama ring Agama Hindu,sadurung karya pawiwahan kamargiang,patut karihinan antuk upacara Widhi Widana katiwakang ring sang maagama tiyosanring Agama Hindu.Upacara kadi inucap matesges upacara Sudhi Wadani
- (2) Upacara Sudhi Wadani kadi sinurat ring ajeng taler karihinin antuk ngalingga tanganin “ Surat Pernyataan “ sane nyihnayang sang kaupacaranin Sudhi Wadani punika sampun nilar agamanya tur ngawit maagama Hindu

Palet 2
Indik Nyapihin
Pawos 66

- (1) Nyapihan inggih punika tan katutugang makurenan sangkaning palas
- (2) Balu inggih punika tan katutugang makurenan sangkaning sinalih tunggil lampus
- (3) Palas makurenan wenten kalih soroh inggih punika sangkaning pada lila miwah mawit wicara
- (4) Sang jagi palas makurenan patut atur supeksa rihin ring sang rumawos (Pengadilan Negeri) tur sesampune kapastikayang palas prajurune nyiarang ring Desa/Banjar kadulurin upakara manut dresta

Pawos 67

- (1) Pah-Pahan sang nyapihan yening nyapihane lila :
 - a. Polih pahan pada pangunakaya
 - b. Pabekel,tatadan suwang-suwang kakinawasa niri-niri,sakewanten warisan kakinawasa antuk sang purusa;
 - c. Yening riwekas sang nyapihan adung malih,patut ngalaksanayang upacara pawiwahan manut kadi awig-awig puniki

Pawos 68

- (1) Sang balu kabinayang dados :
 - a. Balu luh wit sentana (sentana rajeng) miwah balu luh boya sentana;
 - b. Balu muani wit sentana (kapurusan) miwah balu muani boya sentana (nyeburin)
- (2) Swadharmaning Balu :
 - a. Ngamanggehang pati brata,tan dados ngamargiang para dara/drati karma
 - b. Nguasayang waris pangunakaya,tan dados ngadol,ngadeang,makidihang sajabaning sampun kadadosang olih pianaknia utawi sakeng pakulawargania pinih tampek;

- c. Ngalaksanayang pangabenan kulawargania sane during kaabenang,muputang upacara pitra yadnyania manut dresta tur ngupajiwa kulawargania sane kantong maurip;
- d. Dados ngidih sentana yening sampun wenten pidabdab saduring sinalih tunggil lampus tur kalugra antuk kulawarga purusa;
- e. Balu muani nyeburin dados mawiwaha malih yening sampun kawehin antuk pianaknia daha/truna utawi kulawarga purusa.

Pawos 69

- (1) Balu kaucap tan pageh luire :
 - a. Paradara/drati karma
 - b. Matilar sakeng paumahan tanpasadok nyantos nem (6) sasih
 - c. Lempas sakeng swadarmaning balu,tan prasida ngesehin solah setata tungkas ring sapituduh kulawarga purusa
- (2) Yening macihna kadi sinurat ring ajeng manut Tri Premana,balu luh boya sentana utawi balu muani nyeburin wenang :
 - a. Kawaliang antuk kulawarga purusa tur kadadosang makta pahpahan pangunakaya;
 - b. Tan polih waris
- (3) Yening balu punika pageh,ka ekan-ekanang antuk kulawarga purusa,balu inucap tan wenang kawaliang yening ekan-ekan punika tanpa bukti
- (4) Sang ngawi ekan-ekan punika kakenanin pamidanda ngaraja pisuna,mrayascita raga miwah prayascita sang ka ekan-ekan manut pararem

Palet 3

Indik Sentana

Pawos 70

- (1) Pratisentana inggih punika sentana sane metu sakeng pawiwahane kapatut
- (2) Sentana paperasan inggih punika sentana sangkaning ngidih saantukan sang ngidih nenten ngawetuang preti Santana,kadulurin upasaksi sekala-niskala
- (3) Yening pawiwahane tan kapatut,raris ngawetuang sentana,mangda tan kawastanin babinjat,patut kamanggala antuk sinangaskara

- (4) Sentana rajeg inggih punika preti sentana wadon sane kamanggehang lanang tur sampun ngalaksanayang pawiwahann nyeburin

Pawos 71

- (1) Sane kapatutang nyeburin sentana rajeg punika,jadma sane maagama Hindu,pakilitan kulawarga pinih tampek,tunggal paib utawi jadma abanjaran/desa
- (2) Yening sane nyeburin punika jadma maagama tiyosan,patut sang maagama tiyosan punika kasudhi wadani karihin antuk ngalinggatanganin “ Surat Pernyataan “ nilar agamanya tur ngaranjing maagama Hindu

Pawos 72

- (1) Meras sentana patut malarapan saksi sekala-niskala
- (2) Sapasira ugi pacing meras sentana patut masadok ring Prajuru Banjar sanistannia tigung sasih sadurung meras
- (3) Prajuru Banjar patut nyiarang ring Krama Banjar
- (4) Yening wenten Krama Desa/Banjar nenten manut ring pangrencanan sang jagi mameras,mangda masadok ring prajuru Desa/Banjar kalih wuku sadurung upacara pamerasane kamargiang
- (5) Prajurune digelis mawosin saha ngicenin pamatut madasar antuk catur dresta miwah pararem
- (6) Yening sulur paperasanne tan manut kadi sinurat ring ajeng,prajurune wenang ngandeg,saha ngicenin panuntun,muputang sulure utawi wicarane
- (7) Yening sinalih tunggil rumasa tan polih pamatut,dados matur supekse ring sang ngawewenang

Pawos 73

- (1) Pamerasan sinanggeh sampun pastika risampun :
 - a. Mawidi widana
 - b. Kasaksinin antuk Prajuru saha ngilikitayang;
 - c. Kasiarang ring wawidangan Banjar/Desa
- (2) Selanturnia mangda kakaryanang ilikita pastika (akta) ring sang ngawewenang

- c. Santana Paperasan lanang/wadon
- (2) Yening tan wenten kadi sinurat ring ajeng sang sinanggeh ahli waris :
 - a. Turunan Purusa pernah ngunggahang, rerama lanang, pekak selantur ipun rerama misan mindon;
 - b. Turunan Purusa pernah kesamping makadi keponakan

Pawos 77

Swadharmaning sang ngawaris (ahli waris)

- a. Nerima tur nguasayang tetamian leluhurnia;
- b. Nyeledihin ayah-ayahan pewaris;
- c. Ngemanggehang kalestarian warisanne;
- d. Ngabenang pewaris saha ngalanturang upacara-upacara Pitra Yadnyania;
- e. Ngupapira pewaris sepatutnia salami kantong maurip;
- f. Nauru tang-utang pawaris

Pawos 78

Pahan warisan risampun Pawaris kapitra yadnyain miwah kataur utang-utangnia :

- a. Para ahli waris polih pahan sangkaning pangunakayan miwah tetamian pewaris. Mungguing akehnyane, sentana lanang polih ategen, sentana wadon sadurung mawiwaha polih asuwun;
- b. Karang desa sane manut Tri Mandala luire Utama Mandala, Madya Mandala lan Nista Mandale tan dados kapah

Pawos 79

Sang ngawaris (ahli waris) tan polih pahan yening :

- a. Nilar Kawitan lan nilar sasaning Agama;
- b. Alpaka Guru Rupaka (tan manut ring linging putra sasana);
- c. Ninggal kadatuan, inggih punika sentana rajeg kesah mawiwaha, utawi Preti Sentanane mawiwaha nyeburin

Pawos 80

(1) Boya ahli waris kadadosang muponin hasil manut dudonan :

- a. Sentana luh sadurung marabian utawi nenten alpaca guru (manut ring linging putra sasana);

- b. Balu Luh boya sentana, balu muani boya sentana salami ngamargiang swadarmaning balu;
 - c. Sang Ngungsi Kadang
- (2) Pawaris rikala maurip kadadosang maweweh jiwa dana, tatadan/bekel, maka cihna paweweh tetep ring pianak sane kesah mawiwaha, manut paigum sang ngawaris (ahli waris)

Pawos 81

Yening sajeroning pakulawarga wenten sang ngawaris (ahli waris) langkungan ring adiri, patut :

- a. Ngawentenang paigum indik pedum waris inucap;
- b. Yening paigumanne nenten mangguhing kasumanggeman, patut tunasang tetimbang ring prajuru;
- c. Yening during pada lasia, dados nunas pamatut ring sang ngawenang

Pawos 82

(1) Yening wenten karang kaputungan, Prajuru wenang mawosin madasar antuk nureksa silsilah pakulawangan sane kaputungan.

Sane kadadosang ngawaris :

- a. Sang sinanggeh ahli waris manut awig-awig puniki;
 - b. Sang dados anggen sentana manut awis-awig puniki;
 - c. Sang kacatri antuk Krama Desa Adat;
 - d. Sang kacatri antuk Sang Ngawewenang yening tan wenten kadi sinurat ring a, b, c
- (2) Yening ngantos karang desane kasepih, suwang-suwang sang polih pahan sepihan patut tedun makrama desa.

SARGA VI

WICARA LAN PAMIDANDA

Palet 1

Indik wicara

Pawos 83

- (1) Kelihan Banjar wenang mawosin utawi mutusang wicara yening sang mawicara tunggil babanjaran.
- (2) Bendesa adat wenang mawosin utawi mutusang wicara yening :
 - a. Sang mawicara mabinayan banjar;
 - b. Sang mawicara mabinayan Desa sakewanten genahe mawicara ring wewidangan Desa adat;
 - c. Wicarane nganinin druwen Desa Adat;
 - d. Sang mawicara rumasa tan polih tiwakan pamatut ring Kelihan Banjar,raris nunas tatimbang ring Bendesa Adat.
- (3) Yening sang mawicara rumasa nenten polih tiwakan pamatut ring Kelihan Banjar lan rong Bendesa,dados nunasang pamatut ring sang ngawewenang

Pawos 84

- (1) Sahanan wicara sane mawiwit saking sakaluir kacorahan miwah sinanggeh nungkasin daging Awig-awig,pararem lan pasuara tiyosan,mangda kabawosin digelis tan nyantosang pasadok
- (2) Sajaba wicara kadi sinurat ring ajeng,Prajuru patut nyantosang pasadok sang nunas pamatut
- (3) Panepase mangda pastika,nyantenang iwang patut malarapan antuk Tri paramana (saksi,ilikita,bukti) tur tan lempas saking Catur Dresta

Palet 2

Indik Pamidanda

Pawos 85

- (1) Desa/Banjar wenang niwakang pamidanda ring kramane sane sisip
- (2) Sane patut niwakang pamidandane punika ten tiyos Bendesa/Kelihan Banjar

- (3) Agung alit pamidanda manut sor singgih sisipe,ngupadi dharma kaolas arsa ngutamayang kanirmalan Desa/Banjar
- (4) Bacakan pamidanda luwire :
 - a. Ayahan pinaka panukun sisipe;
 - b. Artha danda;
 - c. Nunas pangampura (nyuaka iwang)
 - d. Panyangaskara;
 - e. Kanorayang makrama
- (5) Rarampagan sane agung alitnia manut pararem
- (6) Pamidanda sane marupa artha brana dados padruweyan banjar/Desa

SARGA VII
NGUWAH-NGUWUHIN AWIG-AWIG
Pawos 86

- (1) Nguwah-nguwuhin Awig-awig puniki kalaksanayang yening wenten kasumanggeman paruman desa
- (2) Paruman inucap mangda kadasarin antuk pakarsan karma desa
- (3) Pamutus bawos mangda kadasarin antuk gilik saguluk
- (4) Yening tan sida gilik saguluk,kawentenang cacah jiwa karma,tan maren nginggilang Demokrasi Pancasila
- (5) Awig-awig puniki dados kawewehin,kakirangin yening kalih pah tiga (2/3) kramane sane ngarawuhin paruman masuara manut
- (6) Parumanne prasida kamargiang yening aparo lintang kramane ngarawuhin
- (7) Nguwah-nguwuhin Awig-awig puniki kawentenang ring Paruman Agung

Pawos 87

- (1) Sahanan sane wenten sadurungnia,patut kaanutang ring sadaging awig-awig puniki
- (2) Sahanan sane during kasurat ring awig-awig puniki,kalaksanayang manut tatacara ring awig-awig puniki,kadulurin antuk pararem-pararem

SARGA VIII
PAMUPUT
Pawos 88

- (1) Awig-awig puniki mawasta AWIG-AWIG DESA ADAT KERAMAS
- (2) Awig-awig puniki kamargiang ngawit kararemin
- (3) Awig-awig puniki kararemin ring Pura Desa Keramas duk rahina :
Wraspati Kliwon Langkir, Pengelompok 2 saisah Kadasa Isaka Warsa
1912, tanggal 12 April 1990
- (4) Awig-awig puniki kalingga tanganin antuk Bendesa Desa Adat
Keramas, Kelihan-kelihan Banjar sawewengkon Desa Adat Keramas miwah
Perbekel Desa Keramas lan Camat Blahbatuh pinaka saksi-saksi, tur
kapastikayang saha kalingga tanganin antuk Bupati Kepala Daerah Tingkat
II Kabupaten Gianyar



Desa Adat Keramas

[Signature]
Gusti Putu Putra.



Kelian Adat Banjar Risa

[Signature]
Gusti Putu Nega.



Kelian Adat Banjar Gelgel

[Signature]
Mada Djalawa.



Kelian Adat Banjar Palak

[Signature]
Nyoman Pancer.



Kelian Adat Banjar Lodpekn

[Signature]
I Gusti Putu Reteg



Kelian Adat Banjar Lebah

[Signature]
Gde Karsa Surtika




Kelian Adat Banjar Maspait

[Signature]
Ranyu Rati.

Sekel -

1. Perbekel/Kepala Desa



[Signature]
I Ketot Gidlem.

2. Camat Dlabatuh



[Signature]
Anak Agung Gde Oka, BA.
NIP. 600.05117

MEMUTAKHIRI DAN TELAH DICATATKAN

PADA TANGGAL 12 APRIL 1990

NOMOR 2 TAHUN 1990



RAJAH TINGKAT II GIANYAR

[Signature]
SUGIYONO RAKA MURANA, SH -

NIP. 130 146 198

PAMAHBAH LAN PANUNTUN

Om swastyastu,

Pararem-pararem puniki kakaryanin kadi kabuwatang antuk Awig-awig Desa Adat Keramas.

Pawos-pawos ring Awig-awig inucap, sane muatang Pararem, karincikang antuk Sabha Desa Adat Keramas kasarengin antuk Bendesa Desa Adat Keramas, kasobyahang ka Banjar-banjar, tur sasampune kararemin ring sowang-sowang Banjar, raris kasurat kadi puniki.

Ilikita Pararempararem ouniki tan wenang pinasah ring Awig-awig. Awig-awig pastika mangda wenten makaronan ring Pararem puniki riantuk yukti dahatsengka maosang indik Pararem puniki yan tan kasandingin antuk Awig-awig.

Inggih kadi asapunika atur tityang moghi wenten pikenohnyane.

Om Shantih, Shantih, Shantih, Om.

AWIG-AWIG DESA ADAT KERAMAS

PARAREM – PARAREM

Wilang	Muka	Pawos	Daging Pawos, Daging Pararem
1	2	3	4
1.	3	8b.	<p>Ageng alit atag-atagane manut Pararem Desa.</p> <p><u>Pararem :</u></p> <p>Pengatagan Kalaksanayang ring Ajeng Pura Banjar rikala Tumpek Kuningan. Pangatag Sekala marupa beras akilo, adeng bebek abungkul, kapaice ring soang-soang sang kaatag. Pangatag niskala, ngucapang samaya katuntun antuk Prajuru Banjar.</p> <p>Daging Samaya :</p> <p>Om Sukham bhawantu, purnam bhawantu, sriyam bhawantu sama sampurna ya namah swaha.</p> <p>Tityang masemaya, sumanggup dados Krama Banjar miwah Krama Desa Adat Keramas, tur susatya, pacang ngalaksanayang swadharmaning krama manut kadi linging Awig-awig miwah Pararem-pararem Desa Adat Keramas.</p> <p>Om Sukham bhawantu, purnam bhawantu, sriyam bhawantu sama sampurna ya namah swaha. Om Shantih, Shantih, Shantih, Om.</p> <p>Sasampune kaatagring Banjar, Prajuru Banjar nyadokang ring Bendesa. Sakeng Desa jagi wenten pangatag marupa paice karangan rikanjekan piodalan ring Pura Desa.</p> <p>Sasampune puput kapula-pali kadi ring ajeng, wawu pastika kabawos Krama Desa saha</p>

1	2	3	4
2	4	11/3a.	<p>Ngawit kekening tategenan manut linging Awig-awig. Mapuangkid : ngaluputin ayah-ayahan Desa utawi Banjar maduluran sasadok saantukan sungkan, mayadnya,matapetin,miwah sane tiyosan manut parerem;</p> <p><u>Parerem :</u> Indik mapuangkid, kaimbuhin :</p>
	5	11/3d.	<p>kaluasan,makalin,masalah,mamulih. Mogpog ngantosin ayah-ayahan utawi papeson antuk arta brana (jinah). Mungwing agung alitnia manut parerem.</p> <p><u>Parerem :</u></p>
	5	11/3e.	<p>Tan nyarengin sangkep,samua,mekarya lsp.kakenian dadosan mepengharga beras ½ kg. Ngoot : ngentosin ayah-ayahin utawi papeson antuk arta brana yening megenah ring dura dasa sajabaning punika tan kadadosan ngoot ;</p> <p><u>Parerem :</u></p>
3	5	12/3	<p>Mungwing ageng pangoot,beras 10 kg. nyabran enem sasih,katur ring rahina Tumpek Kuningan.Sane kabaos Dure Desa : Desa saluaring desa adat Keramas.</p> <p>Yening mawali mekrame desa utawi makrama Banjar sangkaning katrima malarapan parerem Desautawi Banjar, keni pamidanda manut parerem Desa utawi Banjar.</p> <p><u>Parerem :</u></p>
4	7	16 c	<p>Pamidanda naur pamogpog katahnyane 100 kg. beras.</p> <p>Patios tiyosan manut parerem.</p>

1	2	3	4
5	8	18/1b	<p><u>Pararem :</u> Luput Manuk. Paruman Banjar : Kawentenang manut dresta utawi pararem.</p> <p><u>Pararem :</u> Paruman nyabran rahina Tumpek miwah rahina tiyosan manut kawiggunannia.</p>
6	9	21/3	<p>Yening ten manut kadi sinurat ring ajeng,sang kasisipan patut mryascita kulkul punika tur kakenian artha – denda manut pararem.</p> <p><u>Pararem :</u> Sang nepak kulkul tan sangkanaing pituduh Prajuru kadande antuk 10kg beras.</p>
7	12	28/2	<p>Sang manungkas warane (larangane) kadi sinurat ring ajeng em. kakeniang pamidande prayascita tur pamidanda arta manut pararem</p> <p><u>Pararem :</u> Yening ngelahin karang pamidandannyane ngualiang tanahe sane kalalah maimbuh 25% saking katah tanahe sane kalalah. Yening ngardi cemer genahe sane kasuciang kadande : mrayascita genah inucap meimbuh denda 10kg beras.</p>
8	13	30/2	<p>Yening wenten wewangunan nyayubin kapisaga, Prajurune risampune polih pasadok sakeng sang kasayubin,patut netesang tur salanturnia patut muputang wicarane manut pararem Desa utawi Banjar</p> <p><u>Pararem :</u></p>

			Sane ngayubin mangde kagetep raris ngabangin miwah kakenanin danda 10 kg beras.
--	--	--	---

1	2		4
9	13	31/2	Sang tan nganutin kadi sinurat ring ajeng katiwakin pamidanda pryascita genah sane kasuciang tur danda arta manut pararem. <u>Pararem:</u> Danda arta : 10 Kg.Beras
10	14	32/2	Sang tan nganutin kadi sinurat ring ajeng katiwakin pamidanda mryascita genahe sane kasuciang tur danda arta manut pararem <u>Pararem :</u> Danda arta : 10 kg beras
11	14	33/4	Yening sang madrue wewalungan pinika saha bukti rauh ngangkening sang madrue wewalungan punika kakenanin pamidanda manut pararem <u>Pararem:</u> Yening kirang ring asasih walungane kataban sang nuwenang rauh ngangkenin saha bukti sang nuwening inucap kekenian pamidanda marupa pangargan tatedan wawalungane salami kataban lan pangantos tuyuh miara miwah danda artha (jinah) : 10% sakeng panghargan wawalungan inucap.Sang ngrinciang pangargan pangentose punika wantah Prajuru.
12	14	33/7	Yening sang naban melaksana lempas ring awig-awig puniki sang naban punika kakenanin pamidanda manut pararem <u>Pararem :</u> Sang naban ngawaliang pangargan wawalungan punika.

13	15	34/6	Yening wenten jadma mamisuh utawi nguman-uman jadma tiyos, kakenin pamidanda pacamil tebasan prayascita lan danda arta.
----	----	------	---

1	2	3	4
14	15	36/1	<p>Manut pararem. <u>Pararem :</u> Danda artha 10 kg beras.</p> <p>Yening wenten Krama Desa jagi nglaksanayang yadnya suka utawi duka tur jagi nunas panyanggran Banjar, mangda atur supeksa ring Prajuru Banjar mangda atur supeksa ring Prajuru Banjar manut ageng-alit yadnyane. <u>Pararem:</u> Tatakrama nunas panyanggran Krama, kapinihajeng sang maduwe yadnya ngundang sowing-sowang Krama raris Prajurune ngaawentenang parum. Ring ajeng paruman inucap, sang nunas panyanggra mangda atur supeksa.</p>
15	16	36/2	<p>Panyanggran banjare wantah manut kadi dresta pararem utawi pasuara Banjar Sowang-sowang. <u>Pararem:</u> Panyanggran karma ring sang mayadnya luwire : Beras 1kg. adeng bebek abungkul miwah dupa ablongsong.</p>
16	17	40/2	<p>Agung-alit upacara/upakarane manut pararem. <u>Pararem:</u> Soroohan tiga saha runtuannia, pagalihan, pamereman, soroohan punggel ring payupitan miwah ring segara. Kramane taler taler</p>

17	18	42e	nyanggra antuk kakaryan Luput tiyosan manut pararem Desa <u>Pararem:</u> Luput manuk.
----	----	-----	---

1	2	3	4
18.	18	43/3	Yening Pamangku Kahayanan Tiga keni ujar ala ulah ala Pamangku punika patut kaprayascita,keprebayanin antuk Krama Desa.Sang maweh ujar ala kakenanin pamidanda manut pararem. <u>Pararem:</u> Pamidandan sang sisip : naur pangargan banten pamrayascitan inucap,maimbuh danda arta: 100kg beras.
19.	20	48/1	Krama Desa Adat Keramas patut ngaturang punia bakti, sane ageng alitnia manut pararem sane jagi kahatur ring sang Pandita. <u>Pararem :</u> Punia Bhakti marupa gedong pakoleman sane kakaryang ring palemahan gerian sang pandita.
20.	20	48/2	Yening sang Pandita lina, layonne kageseng manut dresta tur prabeane kasanggra antuk Krama Desa Adat Kramas. <u>Pararem:</u> Pateh kadi pararem pawos 40/2 ring ajeng.
22.	22	52/2b	Yening ngaben masa soang-soang krama patut mapica patus ring sang mayadnya manut pararem. <u>Pararem:</u> Kadi Dresta

22.	22	52/2c	<p>Yening ngaben dadakan kramane nenten keni patus,sakewanten patut mapitulung tur madana punia ring sang mayadnya manut pararem.</p> <p><u>Pararem:</u> Ageng dana punia sanistania beras akilo,adeng bebek abungkul,dupa ablongsong.</p>
-----	----	-------	---

1	2	3	4
23	22	53/3	<p>Yening wenten wong tan Krama Desa Adat Keramas sakewentan maagama Hindu jagi mendem utawi ngaben ring Desa Adat Keramas patut ngaturang penanjung Batu manut pararem,tur genahe medum utawi ngabenang ring setra pangalu.</p> <p><u>Pararem:</u> Wong Dura Desa,Kamawon wenten Krama Desa Adat Keramas sane nguwub,keni penanjung batu 5kg beras ;genah upacarane ring genah sang nguwub.Wong Dura Desa tan wenten nguwub keni penanjung batu 10 kg beras tur genahnyane ring setra pangalu.Wong Keramas sane tan makrama Desa Adat Keramas keni penanjung batu 1kg ping katah Krama Banjar genah pelemahannyane. Upacarane ring setra pangulu.</p>
24.	23	55/7	<p>Kacuntakang sakaning salah timpal,manut pararem lan pasuare.</p> <p><u>Pararem:</u> Mryascita raga, mryascita Desa manut linging Sastra Agama.</p>
25	26	60/2	Mangda Catur Brata Penyepiane mamargi

26	26	60/3	<p>trepti, Prajuru wenang nureksanin, kawantu antuk pecalang sane kaadegang antuk Krama Desa Adat.</p> <p><u>Pararem:</u> Sakuwub Angga Sabha Desa kawantu Pecalang, sane nureksanin pelaksanaan Catur Brata Panyepiane.</p> <p>Sang tan nginutin Catur Brata Panyepian kadi sinurat ring ajeng, kakenian pamidanda manut pamarem.</p>
----	----	------	---

1	2	3	4
27	27	64	<p><u>Pararem :</u> Para Angga Sabha netes sang sisip,risampune kapastikayang sisipnyane,katiwakin pamidanda pinih makweh wantah 3kg beras.</p> <p>Yening wenten pasadok sane madasar antuk saksi lan bukti wenten wong salah karma : gamia –gamana dreti karma (mamitra,mamarikosa), patut kasisipang lan tan katutugang tur katiwakin pamidanda manut pararem saha mryascita Desa.Agung-alit pryascita manut dudonan sisipe.</p> <p><u>Pararem:</u> Pamidandane maimbuh mryascita raga.</p>
28	29	69/4	<p>Sang ngawi ekan-ekan pinika kakenanin pamidanda ngaraja pisuna,mrascita raga miwah mryascita sang kaekan-ekan manut pararem.</p> <p><u>Pararem:</u> Sang lumaksana ngaraja pisuna inucap,kaimbuhin danda 10kg beras</p>
29	30	72	<p>Sang lumurang lumaksana pamerasan,sesampune kaandang antuk Prajuru,Prajuru wenang tan</p>

			nyaksiang tan ngilikitayang tur sang kaperas nenten kaangkenin pinaka panyeledihi sang mameras.
--	--	--	---

Sapasiraja, sakama Krama Desa Adat Keramas tan anut ring sadaging Awig-Awig miwah Pararem-pararem Desa Adat Keramas puniki, katiwakin pamidanda kadi ring sor :

1. Tan polih pasubayan Prajuru, tan kabawosin sahanan wicarannyane, manut kadi patitis Desa
2. Tan kasarengang ritakala matikayang pamutus
3. Kanorayang makrama Desa Adat Keramas

Kapastikayang oleh :

Mangala Sabha Desa Adat
Keramas

Bendesa Adat
Keramas

Drs. I Gusti Agung Wiyat, B

I Gusti Putu Putra

I. Kararemin Ring Banjar Biya
Duk Rahina : Tumpek Krulut

Tanggal : 17 Desember 1994

Kelihan Banjar Biya :

(I Gusti Putu Mega)

II. Kararemin Ring Banjar Gelgel

Duk Rahina : Tumpek Krulut

Tanggal : 17 Desember 1994

Kelihan Banjar Gelgel :

(IMade Bun)

III. Kararemin Ring Banjar Palak

Duk Rahina : Tumpek Krulut

Tanggal : 17 Desember 1994

Kelihan Banjar Palak :

(I Nyoman Pancer)

IV. Kararemin Ring Banjar Lodpeken

Duk Rahina : Tumpek Krulut

Tanggal : 17 Desember 1994

Kelihan Banjar Lodpeken :

(I Gusti Nyoman Raka)

V. Kararemin Ring Banjar Lebah

Duk Rahina : Tumpek Krulut

Tanggal : 17 Desember 1994

Kelihan Banjar Lebah :

(I Wy. Nengah Rata)

VI. Kararemin Ring Banjar Maspait

Duk Rahina : Tumpek Krulut

Tanggal : 17 Desember 1994
Kelihan Banjar Maspait

(**I Made Masa**)

DESA ADAT KERAMAS
PARAREM INDIK TAMIU

1. **Tamiu inggih punika :**

Sahananing wawang sane jenek madunungan ring wawidangan Desab Adat Keramas, sane tan utawi durung makrama Banjar/Desa

2. **Tamiu kabaga dados 2 i.p. :**

Tamiu sane maagma Hindu miwah Tamiu sane maagama tiyosan ring Agama Hindu.

3. **Swadharman Tamiu (Awig-awig pawos 10/2) :**

- a. Tamiu, kasarengin olih krama panyanggra, patut masadok ring Prajuru Desa Adat Keramas saha nyihnayang ilikita pastika sakeng sang ngawewenang, masengker arahina sakeng pangrawuhnyane.
- b. Tamiu sane sampun makula warga, rikala masadok ring Prajuru Desa Adat Keramas, dados kasade olih kula patinnyane, kemawon sane durung makula warga, mangda masadok soang-soang.

4. **Sengker Tamiu :**

- a. Sengker tamiu sane mawiwit saking Desa Adat Medahan, sakaring kehanan sakeng nguni Desa Adat Keramas miwah Desa Adat Medahan tan wenang pinasah, jagi katata ngaraga (diatur secara khusus).
- b. Tiyosan ring aksara ‘a’, sengker nerima tamiu selami 7 (pitung) rahina. Langkungan ring punika paturt masadok malih ring Prajuru Desa Adat Keramas tur sengker salanturnyane kadadosang wantah malih atumpek.

- c. Yening langkungan ring aksara ‘b’, tamiu mucap, yening maagama Hindu, patut kapastikaang karob ring Desa Adat olih sang krama panyanggra, turmaning patut inut satuut ring awig-awig Desa Adat Keramas.
- d. Yening langkungan ring aksara ‘b’, tamiu inucap, yening maagama tiyosan ring Agama Hindu, patut masadok malih ring prajuru Desa Adat Keramas.

5. **Tategenan Tamiu :**

Tamiu patut nawur saurah urih tata caraning madunungan, luire :

- a. Pangentos/panukun ayahan tanah desa genah ipun jenek makatah apangharga beras akilo, soang-soang tamiu sane sampun makarya ngaruruh pangupa jiwa, nyabran atumpek.
- b. Prabea pacalang makatah apangharga 0 kg beras nyabran atumpek
- c. Danapunia sakasidan, manut babutannyane
- d. Aksara ‘a miwah b’ katawur nyabran tumpek ring pacelang Desa Adat Keramas sane kacatri.

6. **Olih-olihan tamiu :**

- a. Tamiu polih pasayuban sakeng Desa Adat Keramas
- b. Tamiu sane nemu pati ring wawidangan Desa Adat Keramas, sagelisnyane patut kasadokang ring Prajuru Desa Adat Keramas olih krama panyanggra patut nyadokang ring sang ngawewenang.
- c. Tamiu sane matilar sakeng Desa Adat Keramas, tan polih pah-pahan padruwean Desa Adat.

7. Pamidanda :

- a. Pamidandan tamu : Tamu sane tan satinut ring pararem puniki, napi malih pastika lempas ring tatujon Awig-awig Desa Adat Keramas ngardi kasukertan Desa sekal-niskala, wenang katundung sakeng wawidangan Desa Adat Keramas, tur kasadokang ring sang ngawewenang manut paetangannyane.
- b. Pamidanda Krama Desa Adat : yening wenten sinalih-tunggil krama Desa Adat Keramas machina saha bukti, ilikita, saksi, misunaang utawi corah punika patut mrayascita jagat. Agung alit pamrayascita manut pituduh Ida Padanda. Sisip tamu kaurungang/kajabud.

8. Swadharman Krama Panyanggra :

- a. Nganterang tamu masadok ring Prajuru Desa Adat Keramas arahina (24 jam) saking pangrawuhnyane.
- b. Nyayubin tamu ngudpati kasukertan Desa.
- c. Naur bea pananggra tamu makatah apanghargan $\frac{1}{2}$ kg beras ping soang-soang tamu sane makarya ngaruruh pangupa jiwa, nyabran atumpek.
- d. Naur tategehan tamu yening wenten tamu matilar tanpasadok, makatah kadi sinurat ring aksara '5/a'.
- e. Yening krama panyanggra nenten naur kadi sinurat ring ajeng, kakenanin pamidanda nikel.

9. **Swadharman Prajuru Desa Adat :**

- a. Mitetesin tamiu sane masadok indik :
 - Aran msl. manut KTP
 - Katah kula warga miwah sira sane ngarajeg kula pati
 - Tatujon
 - Ilikita panyangkep tiyosan luire : Surat Jalan, Surat Keterangan Berkelakuan Baik, Surat Perpindahan msl.
- b. Ngilikita indik tamiu ring buku tamiu
- c. Ngicenin pasayuban sapatutnyane

10. **Pacelang**

- a. Kelihan Banjar nyatri pacelang ring soang-soang Banjar ngeninin indik saurah-arih tamiu.
- b. Pacelang patut
 - Netes kawentenan tamiu nyabran kabuatang
 - Netes kawentenan panyanggra nyabran kabuatang
 - Nyadokang pawarah Prajuru Desa Adat ring tamiu miwah krama panyanggra
 - Nyadokang kawentenan tamiu ring Prajuru Desa Adat
 - Nuduk tategenan tamiu selanturnyane ngaturang ring Kelihan Banjar. Kelihan Banjar nyadokang ring Pesamuan Krama nyabran Tumpek

- Yening I Pacelang lempas ring swadharma napi malih mabukti corah, kakenanin pamidanda nikel ring tategenan tamiu/panyanggra tamiu.

11. **Olih-olihan Pacelang :**

Pacelang polih olih-olihan makatah aparo (50 %) saking tatawuran sane ngeranjing saking tategenan tamiu miwah krama panyanggra tamiu, sejawaning katerimaang nyabran Manis Tumpek ring Pura Desa, Desa Adat Keramas.

12. **Nguwah-nguwuhin Pararem :**

- a. Nguwah-nguwuhin pararem kalaksanaang ring pasamuhan Sabha Desa, Desa Adat Keramas.
- b. Pararem puniki kalaksanaang ngawit kararemin.
- c. Sakaluirin indik tamiu saderengnyane, patut kaanutang ring daging Pararem puniki
- d. Sakaluirin sane durung kabaos sajeroning pararem puniki, patut kalaksanaang manut tata cara sane sampun mamargi.

13. **Pamuput :**

- a. Pararem indik tamiu puniki kararemin duk rahina Redite Umanis Wuku Klau, pangelong ping 4 Sasih Kasanga, Isaka warsa 1921, tanggal 7 Maret 1999.
- b. Pararem puniki kalingga-tanganin olih soang-soang Kelihan Banjar, Bendesa, Manggala Sabha Desa, Desa Adat Keramas, tur kapitegepin olih Kepala Desa Keramas.

c. Sang ngalingga tanganin i.p.:

Kelihan Banjar Biya

Cap & ttd.

I Gusti Putu Mega

Kelihan Banjar Palak

Cap & ttd.

I Gst. Agung Kt. Murdha

Kelihan Banjar Gelgel

Cap & ttd.

I Made Bun

Kelihan Br. Lodpeken

Cap & ttd.

I Wayan Nurita

Kelihan Banjar Lebah

Cap & ttd.

I Gusti Putu Murdha

Kelihan Banjar Maspait

Cap & ttd.

I Made Masa

Manggala Sabha

Desa Adat Keramas

Cap & ttd.

Drs. I Gusti Agung Wiyat,BA

Bendesa Desa Adat Keramas

Cap & ttd.

I Gusti Putu Putra

Kepala Desa Keramas

Cap & ttd.

I Made Supartha, BA

DESA ADAT KERAMAS

PUTUSAN PASAMUAN PRAJURU PANGAREP SABHA DESA DESA ADAT KERAMAS, REDITE 28 FEBRUARI 1999 TATA CARA NARIMA TAMIU PAWIWAHAN

I. Yening Ngidih/mamadik

1. Tamiu malinggih ring hulu
2. Ngaturang suguh amatra
3. Pamangku ngaturang banten pangrawos
4. Ugrawakya (sane kacatri olih sang nampi tamiu) nunas ampura indik kawentenan genah panyanggra msl. tur ngaturang suksma ring pangrawuh sang tamiu. Raris sang tamiu kahaturin galah mabawos.
5. Ugrawakya nyerahang ring sang madue kapatutan kalanturang netes putrinyane sang jagi malayat.
6. Ugrawakya nyerahang ring sang tamiu, nampenen kaledangan sang maduwe kapatutan

7. Ugrawakya nyerahang malih ring sang maduwe kapatutan mangda micayang piteket-piteket ring sang jagi matilar nganten.
8. Ugrawakya nyerahang ring sang tamiu, micayang piteket-piteket ring sang jagi ngangen rabi
9. Ugrawakya nyerahang ring prajuru mangda muputang ilikita sapatutnyane

10. Prajuru micayang pawarah-warrah, pamuput makelingin sang tamiu keni prabea administrasi makatah apangharga beras 12 (roras) kg, sajaba tamiu sakeng Desa Adat Medahan
11. Ngalebar banten olih pamangku

II. Yening Ngerorod

1. Nedungan prajuru rikala majauman
2. Selanturnyane pamargiane pateh kadi sinurat ring aksara I ring ajeng kemawon piteket-piteket nenten kalaksanaang sadu ajeng nanging katitpang.

Menggala Sabha Desa
Desa Adat Keramas

Bendesa
Desa Adat Keramas

Cap & ttd.

Cap & ttd.

Drs. I Gusti Agung Wiyat,BA

I Gusti Putu Putra